

Samningur um einkaskilríki

Fyrir rafræn skilríki gefin út undir milliskilríki Auðkennis

Auðkenni ehf.,
kt. 521000-2790

hér eftir nefnt **Auðkenni**

milli

og

kt.

hér eftir nefndur **skilríkjahafi**

1 Inngangur

Samningur þessi tekur til heimilda og skyldna samningsaðila vegna útgáfu Auðkennis á einkaskilríkjum fyrir skilríkjahafa.

Einkaskilríkin, eru varðveitt á þeim miðli sem Auðkenni hefur gert aðgengilegan og skilríkjahafi hagnýtir. Skilríkjahafa er ljóst að skilmálar samnings þessa gilda einungis um meðferð rafrænu skilríkjanna og ná að engu leyti til þess miðils sem skilríkjahafinn valdi til varðveislu skilríkjanna.

2 Skilgreiningar

Afturköllun: Óafturkræf aðgerð er felur í sér að skilríki eru gerð ógild áður en gildistími þeirra rennur út.

Rafræn skilríki: Vottorð á rafrænu formi sem tengir sannprófunargögn við skilríkjahafa og staðfestir hver hann er. Í skilríkjum er dreifilykill skilríkjahafa ásamt öðrum gögnum, dulritaður með einkalykli Auðkennis.

Skráningarstöð: Aðili sem er ábyrgur fyrir vottun á skilríkjahafa og afhendir rafrænu skilríkin til skilríkjahafa.

Tímabundin ógilding: Sú staða skilríkja að þau eru tímabundið óvirk annað hvort sökum þess að þau hafa ekki verið virkjuð eða sökum þess að verið er að kanna hvort skilríkin beri að afturkalla.

3 Heimild til að nota rafræn skilríki og móttaka skilríkja

3.1 Veiting heimildar

Auðkenni veitir skilríkjahafa heimild til að nota rafrænu skilríkin á gildistíma skilríkjanna, með þeim skilmálum sem greinir í samningi þessum og almennum skilmálum fyrir rafræn skilríki gefin út undir Fullgildu auðkenni, þegar það á við.

3.2 Takmarkanir á heimild

Skilríkjahafa er ljóst að skilríkin eru tengd persónu hans og honum er eingöngu heimilt að nota skilríkin í tengslum við aðgerðir sem varða hann sjálfan.

3.3 Móttaka skilríkja

Með undirritun samnings þessa staðfestir undirritandi móttöku rafrænu skilríkjanna.

4 Framkvæmd samningsins

Vottun einstaklinga við afhendingu rafrænna skilríkja fer fram á skráningarstöðvum á vegum Auðkennis. Skráningarstöðvar hvorki undirrita skilríkin né gefa þau út.

Auðkenni gerir samninga við aðila um rekstur skráningarstöðva fyrir hönd Auðkennis. Upplýsingar um skráningarstöðvar má finna á vef Auðkennis.

5 Heimildir og skyldur Auðkennis

5.1 Þjónusta Auðkennis

Auðkenni veitir upplýsingar um stöðu rafrænna skilríkja, þ.e. hvort skilríki eru í gildi, hafa verið afturkölluð eða gerð tímabundið óvirk.

Öll þjónusta sem Auðkenni veitir vegna rafrænu skilríkjanna er í samræmi við vottunarstefnu skilríkjanna eins og hún er á hverjum tíma. Vottunarstefnan er aðgengileg á [auðkenni.is](#).

Auðkenni birtir á vef sínum tilkynningu um allar breytingar á útgefinni vottunarstefnu.

5.2 Gjaldtaka

Auðkenni er heimilt að innheimta gjald fyrir rafrænu skilríkin, hvort sem er í eitt skipti við afhendingu þeirra eða reglulega yfir gildistíma. Ákvörðun um að hefja gjaldtöku verður kynnt skilríkjahafa áður en hún tekur gildi. Gjaldskrá Auðkennis eins og hún er á hverjum tíma, má finna á vefsíðu Auðkennis.

5.3 Þjónusta við afturköllun að frumkvæði áskrifanda

Á gildistíma rafrænna skilríkja skilríkjahafa mun Auðkenni tafarlaust hefja afturköllun þeirra, óski skilríkjahafi þess.

Vilji skilríkjahafi afturkalla rafrænu skilríkin skal hann beina tilkynningu um það til Auðkennis. Hafi skilríkjahafi glatað eða tekið úr notkun miðil sem geymir rafræn skilríki skal skilríkjahafi beina tilkynningunni til þess aðila er lagði honum til miðilinn, símleiðis eða með tölvupósti. Tilkynning sem beint er til Auðkennis hefur einvörðungu áhrif á rafrænu skilríkin og ekki áhrif á virkni miðilsins að öðru leyti.

5.4 Heimildir Auðkennis til einhliða afturköllunar

Auðkenni hefur heimild til að afturkalla einhliða rafræn skilríki sem gefin hafa verið út á grundvelli samnings þessa:

- Ef fyrir liggja upplýsingar Þjóðskrár um að nafn skilríkjahafa hafi breyst.
- Við andlát skilríkjahafa.
- Ef rökstudd ástæða er til að ætla að mistök hafi átt sér stað við útgáfu skilríkja eða við vottun skilríkjahafa.
- Ef Auðkenni eða skráningarstöð telur víst að upplýsingar í rafrænum skilríkjum séu ekki réttar, m.a. að þær hafi breyst, af hvaða ástæðu sem er.
- Við breytingar skilríkjahafans á miðli (t.d. kortaskipti).
- Ef skilríkjahafi hefur rafrænu skilríkin ekki undir höndum, m.a. sökum þess að þau hafa glatast og þeim verið skilað til skráningarstöðvar eða söluaðila.
- Við riftun samnings við skilríkjahafa samkvæmt heimild í grein 10.
- Við verulegar vanefndir notanda.

Við tímabundna ógildinguna eða afturköllun rafrænna skilríkja skal Auðkenni tilkynna skilríkjahafa það án tafar.

6 Skyldur skilríkjahafa

6.1 Upplýsingar til auðkenningar

Skilríkjahafi staðfestir að allar upplýsingar sem hann lét í té í við móttöku rafrænna skilríkja, séu réttar, að hann sé fjárráða við undirritun samnings þessa og að þau opinberu skilríki sem hann lét í té eru ófölsuð og voru gild við móttöku rafrænu skilríkjanna.

6.2 Breytingar á upplýsingum til auðkenningar

Ef nafn skilríkjahafa breytist frá því sem greinir í rafrænu skilríkjunum, skal hann þegar í stað tilkynna skráningarstöð það, hætta að nota rafrænu skilríkin og fela Auðkenni að afturkalla þau. Auðkenni skal þá að ósk skilríkjahafa tafarlaust gefa út ný skilríki. Innheimt er fyrir slíka útgáfu skv. gjaldskrá félagsins.

6.3 Upplýsingar vegna samskipta

Tilkynningar vegna meðferðar rafrænu skilríkjanna eru birtar skilríkjahafa með rafrænum hætti eða í undantekningartilvikum sendar á lögheimili skilríkjahafa eins og það er skráð í þjóðskrá. Upplýsingar um rafrænan birtingarhátt má finna á vef Auðkennis. Skilríkjahafi samþykkir að tilkynningar þannig birtar teljist réttilega sendar skilríkjahafa.

6.4 Meðferð skilríkja við lok gildistíma

Rafrænu skilríkin eru eign Auðkennis. Skilríkjahafi samþykkir að við lok gildistíma skilríkjanna, af hvaða ástæðu sem er (m.a. sökum þess að skilríki eru runnin út eða hafa verið afturkölluð), er honum ekki lengur heimilt að nota þau til að framkvæma nýjar aðgerðir. Eftir lok gildistíma er heimilt að nota skilríkin til tilvísunar til aðgerða eða uppflettingar á aðgerðum er áttu sér stað á gildistíma skilríkjanna.

6.5 Meðferð PIN númers

Skilríkjahafi staðfestir að hann hefur valið sér PIN númer sem fyrir utanaðkomandi er erfitt að tengja við persónu hans. Honum er ljóst að gæta ber fyllsta trúnaðar um PIN númerið. Skilríkjahafi skal sérstaklega gæta að eftirfarandi:

- Óheimilt er að afhenda öðrum PIN númerið eða upplýsa aðra um það.
- Óheimilt er að varðveita upplýsingar um PIN númerið á sama stað og rafrænu skilríkin.
- Skrái skilríkjahafi PIN númerið hjá sér er óheimilt að gefa til kynna að um sé að ræða leyninúmer vegna rafræna skilríkja.

Skilríkjahafi ber ábyrgð á öllum aðgerðum sem framkvæmdar eru með rafrænum skilríkjum.

6.6 Rafrænum skilríkjum stofnað í hættu

Ef skilríkjahafi telur að rafrænu skilríkin hafi með einhverjum hætti verið misnotuð eða öryggi þeirra stofnað í hættu, til að mynda vegna vásetningar miðilsins sem skilríkin eru varðveitt á, skal skilríkjahafi þegar í stað hætta notkun þeirra og óska eftir því að Auðkenni afturkalli rafrænu skilríkin.

6.7 Samþykkt skilríkja og tilkynning vegna villna eða bilana

Skilríkjahafi samþykkir að tilkynna skráningarstöð þegar í stað ef villa er í útgefnum skilríkjum eða ef hann verður var við að rafrænu skilríkin virka ekki með þeim hætti sem ætlast er til.

Notkun skilríkjanna skoðast sem samþykki á þeim upplýsingum sem þar koma fram.

7 Takmörkun ábyrgðar

Auðkenni er eingöngu ábyrgt fyrir tjóni sem kann að verða vegna notkunar rafræna skilríkja ef um er að kenna saknæmu eða ólögmaetu athæfi starfsmanna Auðkennis eða aðila sem Auðkenni ber ábyrgð á, svo sem skráningarstöð.

Undir engum kringumstæðum (að öðru leyti en því sem tilgreint er í 17. gr. laga 28/2001) skal Auðkenni vera ábyrgt fyrir nokkurs konar óbeinu, tilviljanakenndu eða afleiddu tjóni, þar með talið en ekki einskorðað við hvers konar missi á hagnaði, missi afnota, eða refsikenndum bótum eða viðurlögum sem orsakast af eða í sambandi við notkun, afhendingu, leyfi, virkni eða óvirkni skilríkja, rafræna undirskrifta, eða hvers konar framkvæmda, aðgerða eða þjónustu sem boðin er fram eða áformuð í tengslum við rafrænu skilríkin.

8 Vinnsla upplýsinga

Skilríkjahafa er ljóst að Auðkenni mun varðveita upplýsingar ef skilríkjahafi lætur í té við skráningu, tímabundna ógildingu og afturköllun skilríkjanna. Hið sama gildir um upplýsingar um samskipti við skilríkjahafa er varða gildi skilríkjanna og

athugasemdir við að meðferð rafrænu skilríkjanna hafi verið lögmæt.

Skilríkjahafa er jafnframt ljóst að Auðkenni varðveitir upplýsingar sem koma frá þjónustuveitendum í tengslum við notkun skilríkjahafa á skilríkjunum.

Skilríkjahafa er auk þess ljóst að Auðkenni birtir efni rafrænu skilríkjanna innan og utan skráningarkerfis Auðkennis, m.a. í tengslum við stöðufyrirspurnir og afturköllunarlista.

Auðkenni mun við vinnslu framangreindra upplýsinga fylgja í hvívetna lögum nr. 90/2018 um persónuvernd og vinnslu persónuupplýsinga. Nánari upplýsingar um vinnslu persónuupplýsinga má finna á vef Auðkennis, audkenni.is.

9 Gildistími

Gildistími skilríkjanna er sá tími sem tilgreindur er í skilríkjunum sjálfum nema skilríkin séu afturkölluð fyrir þann tíma samkvæmt heimild í samningi þessum.

Samningur þessi tekur gildi þegar skilríkjahafi hefur undirritað hann og gildir á meðan skilríkjahafi hefur einhver gild skilríki samkvæmt 1. mgr. eða þangað til samningurinn er felldur úr gildi með undirritun nýs samnings. Nýrri samningar með ákvæðum sem eru ósamrýmanleg þessum samningi án þess að fella hann úr gildi, ganga framar.

10 Vanefndir

Vanefni skilríkjahafi samning þennan eða hafi Auðkenni vissu fyrir því að öryggi einkalykilsins hafi verið stofnað í hættu, er Auðkenni heimilt að rifta samningi þessum og afturkalla rafrænu skilríkin með skriflegri tilkynningu til skilríkjahafa. Rafræn samskipti eru skrifleg samskipti.

11 Framsal

Rafrænu skilríkin eru bundin við persónu skilríkjahafa. Skilríkjahafa er undir engum kringumstæðum heimilt að framselja rafrænu skilríkin. Þau ganga ekki í arf og skuldheimtumönnun er ekki heimil fullnusta í þeim.

Auðkenni er heimilt að framselja samning þennan til lögaðila sem er í stakk búinn til að takast á hendur skyldur Auðkennis sem greinir í vottunarstefnu skilríkjanna.

12 Lögsaga, varnarþing og undirskrift

Íslensk lög skulu ráða gildi skilmála þessara og túlkun ákvæða þeirra.

Rísi ágreiningur milli skilríkjahafa og Auðkennis vegna umsóknar um rafræn skilríki, notkunar skilríkjahafa á þeim eða vegna réttinda eða skyldna Auðkennis skal hann rekinn fyrir Héraðsdómi Reykjavíkur.

Dags.

Fyrir hönd Auðkennis

Áskrifandi